

1. juli 2019-miit atuutilersumik inatsisinut nalunaarutit atuutsinneqalernissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Peter Olsen, Inuit Ataqatigiit)

Akissuteqaat

(Naalakkersuisut Siulittaasuat)

Aappassaanneerpeqarnera

Inatsisartut Inatsisinut Ataatsimiititaliaat Peter Olsen-ip, Inuit Ataqatigiit, inatsisinut nalunaarutit atuutsinneqalernissaat pillugu aalajangiiffigisassatut siunnersuutaanut isumaliutissiissuteqarneranut Naalakkersuisut qutsavigaat.

Naalakkersuisut maluginiarpaat Inatsisinut Ataatsimiititaliap isumaqatigiittup aalajangiiffigisassatut siunnersuutip akuerineqarnissaa inassutigigaat.

Siullermeerinerup nalaani saqqummiunneqartutut, Naalakkersuisut aallaaviatigut inatsisinut nalunaarutit ilusilinnik pisortatigoortumik inatsisit ataatsimoortillugit allanneqartalernerannik atuutsitsilernissamut akuersaartumik inissisimasut, Naalakkersuisut siusinnerusukkut periarfissat iluatsillugit oqaatigisarsimavaat. Taamaattoq inatsisinut nalunaarutit atuutsitsilernissamut suliaq annertoq ingerlanneqartussaavoq, aammalu suliamik taamatut ingerlatitsinissap aallartinninnerani arlalitsigut isumaliutersuuteqarnissaq pisariaqarluni.

Inatsisinut nalunaarutit atuutsitsisoqalissappat pissutsit assigiinngitsut sillimaffigineqartussat, ataatsimiititaliap isumaliutissiissutaani Inatsisinut Ataatsimiititaliap allaaserai. Ilanngullugu illuatungaani inatsisinut nalunaarutit, inatsisitsinnik atuisunut kiffartuussinerup pitsaanerulerneranik takussutissaassasut. Illuatungaani inatsisinut nalunaarutit atuutsitsilernerq isumalluutit atuinerulernermik malitseqassasooq aammalu pitsaassutsinut inatsisitigullu isumannaatsuutitsinissamut tunngasut arlallit, inatsisinut nalunaarutit atuutsitsilernermi pilertussat, isummerfigineqartussanngussasut.

Aalajangiiffigisassatut siunnersuut akuerineqassasooq Inatsisinut Ataatsimiititaliamit isumaqatigiilluni inassuteqaat tunngavigalugu Naalakkersuisut Ataatsimiititaliap inassuteqaataa tusaatissatut tigugaat, Naalakkersuisut sinnerlugit oqaatigissavara. Pissutsit allat aalajangiiffigisassatut siunnersuummut toqqaannartumik attuumassuteqanngitsut pillugit Ataatsimiititaliaq oqaaseqaateqartoq, aammattaq Naalakkersuisut maluginiarpaat.

Aalajangiiffigisassatut siunnersuut akuerineqassappat, Inatsisartut inatsisaannut inatsisinut nalunaarutit atuutsitsilernissamut tunngavissiinarluni sulineq Naalakkersuisut aallartissavaat. Tamatuma ulloq 1. juli 2019 atuutilersinnaanissaanut piffissaqarluartumik tamatuma pinissaa Naalakkersuisut ilungersuutigissavaat. Taamaattoq isumalluutit pisariaqartut pissarsiarineqarsinnaanersut kiisalu pisortatigoortumik tunngavissat inatsisinneqarsinnaanersut apeqqutaassaaq.

Aalajangiiffigisassatut siunnersuutip akuerineqarnerani sulinissaq annertoq allaffissornermi ingerlanneqartussanngortussaammat, eqqumaffigineqassaaq.

Taamatut oqaaseqarlutik Naalakkersuisut siunnersuut Inatsisartuni suliassanngortippaat.